

երկրագործությունն արդեն շատ առաջ դնացած լինելով, հացը՝ ծանր աշխատանքի արդյունքը, դարձած էր բարօրության հիմք:

Հաց էին դնում ննջեցյալի քթածակերին՝ փաշկերի ներս թափանցելն արգելելու համար: Դնում էին հացը երբեմն նաև ննջեցյալի կրծքին, ոչ թե նրա կերակուրը ապագա կյանքում ապահովելու, որչափ առավելապես փաշկերի մերձենալուց նրան հեռու պահելու համար: Այս հացը պահում են և տալիս մեռելից վախեցածներին, որ սրտապնդվեն: Մի որևէ կտորի մեջ փաթաթած հաց էին պահում նորածին մանկան բարձի տակ: Աղոթքով հմայողն ածուխի և երկաթե իրի հետ հաճախ և մի կտոր հաց էր պահում ձեռքին իր մագիկ աղոթքն արտասանելիս և այլն:

Մաքուր, համեղ և նուրբ պատրաստած հաց ունենալու պահանջի դարգացման հետ պետք է շաղկապել նաև մաղին վերագրվող զորությունը: Մաղի օգնությամբ է, որ հացահատիկը մաքրվում է հողից և հետո ալյուրից էլ հեռացվում են կոշտ մասերը: Մաղով էին գուշակություններ անում¹¹³: Մաղն էր տղաբերքի ժամանակ պաշտպանում երեխային փաշկերի համախոտությունից: Մաղի միջով փաշկն անցնել չի կարող: Մի շատ բնորոշ գործողություն է կապվում մաղի հետ. որպեսզի անբուժելի, ծանր հիվանդությամբ տառապող մեկը երկար չշարժարվի և մահն արագ տեղի ունենա, մաղի միջով մաղում էին մոխիրը¹¹⁴—ուժը կորցրած ածուխ: Ալյուրի փոխարեն մաղով մոխիր անցկացնելն երեկ նպատակ էր հետապնդում դյուրացնել նրա միջով փաշկերի անցնելը և հիվանդին տիրանալը: Նրա մահն արագացնելու այդ գործողությունը կատարվում էր երդիկի վրայից, հոգեհանի կորցրած ճանապարհը բանալու համար: Մաղն էլ գիշերը փոխ չէր արվում, որ տան հացը չպակասի¹¹⁵:

Ավելի հաճախ, քան թե ածուխի, աղի և հացի ու մաղի օգնության, փաշկերի դեմ պայքարելու համար զանգեզուրցին դիմում էր երկաթի՝ պողպատի զորությունը: Փաշկերին ամենից ավելի երկաթն էր կաշկանդողը: Մեր վերև բերած նկարագրությունների մեջ բազմաթիվ անգամ առիթ ենք ունեցել մատնանշելու այն դեպքերը, երբ փաշկերից ապահով լինելու համար դիմում էին երկաթի զորությունը¹¹⁶: Երկաթե մի իր, մեծ մասամբ սուր իր՝ դանակ, դաշույն, ասեղ էր դրվում և՛ ծննդկանի, և՛ նորածնի գլխի տակ: Երեխային լողացնելիս ջրի մեջ էին ձգում երկաթի կտոր, կամ երկու ասեղ: Այն կնոջ տանը, որի երեխան չէր ապրում, նոր աղաբեքի ժամանակ գետնին մեխում էին ժանգոտած մեխ: Տղաբեքի ժամանակ չէին բավականանում երկաթե շշով ծննդկանի շուրջը շրջան խաղելուց՝ երկաթե շղթա էին ձգում շնամքից դուրս, փաշկերի մուտքն արգելելու համար, պողպատի մի կտոր դնում էին բարձի տակ և այլն:

Մեծ պասի վերջին շաբաթվա Օթի ուրբաթ՝ Հուլի ուրբաթ օրը՝ դարբինը շինում էր պողպատե մատանի և պողպատե փոքր շախմախ: Առաջինը աղջիկն էր հագնում մատին, անկասկած, որպեսզի ինչ բանի որ ձեռք տա՝ փաշկից ազատ մնա: Երկրորդը կարում էին երեխայի ուսին կամ կոնակի վերին մասին, որպես կայծակից պաշտպանող հմայիլ: Այս սովորությունը շատերը բացատրում են նրանով, որ փաշկերը կայծակի ժամանակ դիտմամբ փախուստ են տալիս երեխաների մոտ, որպեսզի կայծակը, որ հատկապես փաշ-

¹¹³ Հմմտ. Լալայեան, Ե., Բորչալու, Թիֆլիս, 1901, էջ 188:

¹¹⁴ СМОНПК, вып. XIII, отд. I, էջ 118:

¹¹⁵ СМОНПК, вып. XXXIV, отд. III, էջ 98:

¹¹⁶ Чурсин Г. Ф., Железо у Кавказских народов, ИКИАИ XI, 1927, էջ 67—106: